



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com



TAPAK 8

### Hafiz Saeed kum ter tepuokdak ayutsü



TAPAK 3

### Tarun Gogoi temang tejung tuba makümer

VOL. XVIII NO. 42 (ADOK 42) DIMAPUR

ROGONÜ (FRIDAY) YIMPOKSÜI (NOVEMBER) 20, 2020

₹ 5.00

## North PS, Kohima nem ISO certification agütsü



Additional SP & PTO Kohima aser North PS, Kohima indang ketdangsertem tangokba noksa ka yangi angur.

**Kohima, Yimpoksüi/Nov. 19 (TYO):** Nagaland nung takok tuluka ama aser mezüngbuba süa, North Police Station, Kohima, koba British nungeri Naga Hills district kübok police station mezüngbuba ama 1933 kum amenokja liasü, iba police station nem ISO certification agütsüogo.

Kohima jila tiyong nung amenoka aliba police station ya Inspector rank officer-in-charge ka tekolakba sür lir, kong danga rank 88 tashi lir.

Quality Management System (QMS) kübok telatet balala nung policing aser iba dak sendakba inyakyim, nüburtem sunepa yutsüba, temzüng ozüng junga

ketdang süba, mapa tamajung inyakba nungi nokdangba, putetba aser bushisingdangba, ajungben rongdak nungdak nung teyari balala agütsüba, VIP Security aser nisung shibelenba nungi nokdangba tsütsü ISO 9001:2015 certification agüja liasü.

Nüburtem tenzükbä maparen tajungba kumdaktsütsü aser police station nungi teyari balala bushiba mapang nüburtemi arendaka mebilemetsüsa kumdaktsütsü nükjidong nung Kohima Police ajanga yangi aliba facility tem tajungba kumdakja ano maparen balala bendenloka iba certification inyakyim tenzüka liasü.

(Maneni tapak 2 nung...)

## DC Dimapur-i lokti sentongtem atema metetdaksür

**Dimapur, Yimpoksüi/Nov. 19 (TYO):** Directorate of Health & Family Welfare, Nagaland ajanga kiyimba benjong aser lokti sentong balala atema nüburtem dang ajungshiba den bendenloksema Deputy Commissioner, Dimapur, Rajesh Soundararajan-ia nübur ajak dang iba ama kiyimba benjong aser danga sentongtem ayongtsü atema hopta ana lia Dimapur

District Task Force dang temelaba asüngdangtsüla, ta sangdong ka nung metetdaksü.

Temelaba asüngdanga Dimapur District Task Force dangi züluba sülen parnoki sentong agütsü aliba tesem semdanga COVID-19 protocol aser SOP tem shidak amshir-mamshir, ta asadangba sülen ang temelaba agütsütsü, ta sangdong nungsa shia lir

## Thahekhu yimtsüng nung ki ka shibangtsü

**Dimapur, Yimpoksüi/November 19 (TYO):** Disaster Management Act, 2005, Section 30 (I) (2) nung tashi agüja aliba dak ajemdaker COVID-19 tashidak prokshia aoba nokdangtsü atema Rajesh Soundararajan, IAS, Deputy Commissioner & Chairman DDMA, Dimapur-i, Thahekhu

yimtsüng, Block-I nung Stone Crusher Mill anasa Bhima'er ki osang tejangja ka magütsü tashi ghonda 48 shibanga toktsüba metetdaksüogo.

Iba tenokdangba anema inyakterem Disaster management Act, 2005 aser IPC kübok temerenshi alitsü, ta Dimapur DC-isa ashi.

## Totzü jenjang atuba agi nübur khuret tuluba kümdaktsür: NPP Nagaland

**Kohima, November 19 (TYO):** Tawa Nagaland sorkari petrol aser diesel totzü nung saru atuba ajanga NPP Nagaland State aoksar; Khristmas mongpu nung nüburtem khuret pungbadaktsütsü melen nübur anema totzü nung jenjang tuogo, ta IPR & Media Cell, NPP Nagaland State-i sangdong ka ajanga metetdaksü.

den kasa, ta NPP-i metetdaksü.

"Onoki state sorkar nem ya metetdaksüner-kuli balala ajanga osetsüset/aonsotsü nung jenjang kanga tuogo aser tang totzü jenjang atuba ajanga ano maneni jenjang atutsü atema shishilembartem nem maongka agütsütsü. Sorkari tim masüba nung nüburtem khuret tali kümdaktsütsü atema merangba ya khenyongi taremküktetla masü aser state sorkari inyakba mapa ya onoki sashia aitsür," ta sangdong nung shia lir.

(Maneni tapak 2 nung...)

## Nagaland COVID-19: Active 1,292 aser taneptsü angur 9,007 lir

**Kohima, Yimpoksüi/Nov. 19 (TYO):** Nagaland nung Brehostibarnü nisung tasen 94 dak COVID-19 jangjatet, aser item rongnung frontline worker 22 dena lir, aser tang tashinung state nung iba tashidak agi meneper ajak senteper nisung 10,460 alitsü, ta State Health ketdangsertemi ashi.

"Tanü #COVID-19 positive nisung 94 dak putet. Dimapur nung 71, Peren nung 12, Kohima nung tenet, Mon nung ana, Kiphire aser Phek nung kaka," ta Minister, Health and Family Welfare, S Pangnyu Phom ajanga Twitter nung metetdaksü.

"Ajidang masü COVID-19 positive alir nisung 52 taneptsü nguogo. Dimapur nung 32, Kohima nung 18 aser Mon nung ana," ta paisa ashi.

Iba tashidak puteta alirtem rongnungi nisung 9,007 taneptsü nguogo aser nisung 1,292 tang active lir, ta Director, Health Department, Dr. Denis Hangsing-i anogoshi sangdongba COVID-19 bulletin nung metetdaksü.

State nung iba tashidak nungi taneptsü anguba ya November 13

nü shilem 90.93 liasü saka tang shilem 86.1 nung lir, ta pai ashi.

COVID-19 tashidak agi meneper alir shiranger 58 süogo, aser item rongnung iba tashidak agi asür nisung 48, nisung trok asüba COVID-19 den sendaktepa mali aser nisung pezü asüba tang bushisingdangba mapang lir, ta paisa ashi.

Coronavirus agi shiranger nisung 103 danga state temi ogo.

District shia iba tashidak jangjatetba yamai alitsü: Dimapur nung 5,781, Kohima nung 3,085, Mon nung 576, Peren nung 461, Tuensang nung 182, Zunheboto nung 139, Mokokchung nung 120, Phek nung 44, Wokha nung 29, Kiphire nung 25 aser Longleng nung 18.

Iba tashidak tejangja puteta aliba rongnung armed forces personnel 4,293, tsüngsü pua aoba nungi nisung 3,917, danga state tem nungi meyipa shilanger nisung 1,751 aser frontline worker 499 alitsü, ta Dr. Hangsing-i ashi.

District shia tang COVID-19 active yamai alitsü: Dimapur nung 724, Kohima nung 338, Peren nung

155, Mon nung 33, Tuensang nung 26, Mokokchung nung 7, Phek nung 7, Kiphire nung ka aser Zunheboto nunga ka.

Active cases tem rongnung nisung 33 dak COVID-19 agi temang nung timtem agütsüba terara ajiteter, nisung asem kanga sashia oxygen inoker lir aser nisung trok kangasa mejungi jangshia ICU nung lir. Nisung 1,250 dak iba tashida agi timtem agütsüba mali, ta pai ashi.

Nagaland nung COVID-19 tashidak nungi taneptsü angurtem ya Dimapur nungi 4,957, Kohima nungi 2,716, Mon nungi 532, Peren nungi 306, Tuensang nungi 155, Zunheboto nungi 135, Mokokchung nungi 109, Phek nungi 37, Wokha nungi 28, Kiphire nungi 23 aser Longleng nungi 9 alitsü.

Tang tashinung temolung meleme bilemba sample 1,07,276 tashi Nagaland nung tendanga lir, aser item rongnung RT-PCR ajanga 65,674, TruNat ajanga 35,318 aser Rapid Antigen Test ajanga 6,284 tendanga lir, ta Dr. Hangsing-isa ashi.

## ANCSU aser ENCSU-i scholarship lemstsütsü akhanger

**Dimapur, Yimpoksüi/November 19 (TYO):** All Nagaland College Students' Union (ANCSU) aser Eastern Nagaland College Students' Union (ENCSU)-i külem sangdong ka ajanga, state sorkar aser department of Higher Education dang Scheduled Tribe students 2019-2020 tem atema Post Matric Scholarships tanabuba aser tatembangbuba Instalment lemshitsütsü atema tongtibang süa inyaktsü nenshia metetdaksüogo.

Alima ajanga nung wara poktetba ajanga sorkar inyakyim nung tetsükdaktsü adokba union temi angateter, saka scholarship dak sendakba nung sorkari temulung agüja minyakba ngua kanga temulung masür, ta kasa sangdong ajanga metetdaksü.

2019-20 atema tanabuba instalment sen 32,26,37,000/- aser 2020-21 atema mezüngbuba Instalment (25% of central share) September 18 nü Government of India, Minority of Tribal Affairs (Scholarship Division)-i agütsüogo, ajisiüka department of Higher Education aser state sorkari tanü tashi nung tanabuba aser tatembangbuba instalment lemja mali.

Drawal authority issue asütsü asoshi inyakyimtem angateta lir, ajisiüka kaketshirtem tejangrabatem asaa sentokba yabo union(s)-i ajem ajema repranga matatsü.

ANCSU aser ENCSU-i, department of Higher Education aser state sorkari kaketshirtemi scholarship nüngdakba angateta, iba osang sangdongba anogo nungi tenzüka anogo 10 tsüngda Post Matric Scholarship ST 2019-2020 kaketshirtem nem lemstsütsü atema tenüngdakba inyakyimtem benoka inyaktsü akhanger, ta kasa sangdong ajanga metetdaksü.

## Telemtetba agütsü atema NPF dang nungi temelaba menüngdak: NDPP

**Kohima, November 19 (TYO):** Opposition Naga Peoples Front (NPF)-i Chief Minister aitsüba ajanga parnoki yimsütsüba tsütsü merajemba aser parnoki kum 15 tashi yimsü süaka state sorkar inyakyim merajemba sayur, ta Brihostibarnü NDPP Media & Communication Committee-i sangdong ka ajanga metetdaksü.

"NPF-i Chief Minister aser PDA sorkar kanga aitsüner, ibayongji parnoki junga meshisadanteter aser tanü parnoki parnok meküta atalokba memeteter," ta sangdong nung shia lir.

Nüngdak apir osetsüset nung state sorkari saru meshitsüji tim dang, yamaji tawa petrol, diesel aser

lubricants nung sen tuogo. State finance department-i jangjashitsüba ama Nagaland nung dang masü saka asen kidanger state tem nunga jenjang tuogo. Tanga NE state tem den medemdangra Nagaland sorkaribo saru tajemba. NPF-i taoba mapang bilemdangra DAN yimsütsüba mapang nunga item ama osetsüset nung sorkar shia saru tuogo. Anungji sorkar inyakyim anema opposition NPF-i Chief Minister aser sorkar aitsüba ajanga süngmanger," ta sangdong nung shia lir.

"Nagaland ama senotsü agi anüngba state ka nung saru kanga ajema arur, anungji sorkari iba ama mera agibaji pelaa agizüksüla. Democracy nung opposition tashi

aitsüji tongtibang, saka menüngdakba onüktem nung chief minister aser sorkar aija sorkar telemtetba agienang ta akhangbaji tim masü. State yimsütsütsü atema nüburtemi NDPP-i aniba PDA sorkar shim ta opposition-i angatetsüla, aser nüburtemi shimtetba sorkari telemtetba agütsü atema NPF temelaba meshitsü menüngdaker," ta NDPP sangdong nung shia lir.

Nagaland sorkari petrol, diesel aser tanga lubricants nung saru telemtetba agibaji NDPP-i pelaa agizüker aser state atema saru timba akümtsü asoshi PDA sorkari lemteba ajak pusemstü, ta kasa sangdong ajanga metetdaksü

**CORONAVIRUS WARAS ENOK LONGJEMER AKOKTSÜ ASOSHI -**

Akok tashi lokti mesenteptsü merangang. Mepaidoktetba maparen kar ajanga senteptsüsa kumra, nisungtem tsüngda tepila lia amentsüla, teni tebang nembangka mask agütsüla, mopong peria arudaktsütsüsa kishi aser kichiba junglunga lapokang aser mapang tatsüka dang agiang.

- In collaboration with the Media Cell, RD department, Nagaland





Shamator College nung batch tanabuba graduation sentong ka November 19, 2020 nü Col. Amit Thakur Commandant 45th AR Shamator tesemdang tongti sür agia liasü. Takok angurtem nem tenüngsang agütsüba mapang Col. Amit Thakur-i kaketshir dang maneni nendaka agüja aser meranga inyaksü ajungshia liasü. Sentong nung Shamator College indang Vice Principal, Arentula-i graduate asüba kaketshir ajak nem tenüngsang agütsü, Governing Body SCS züngsem Keozih, Toking EAC, Hopong V.P nungertemia kaketshir ajungshia liasü. Kasa sentong nung 5th Semester nungi Kiuphula aser Retsong Z nungeri jembli.

## ENSF-i Nagaland sorkar nem anogo tenet latettsü

**Kohima, Yimpoksüi/November 19 (TYO):** Government sector nung Eastern Naga nungertem employment dak sendakba nung parnok takhangba ataloktsütsü asoshi Eastern Naga Student's Federation (ENSF)-i anogo tenet latettsüogo. Parnok takhangbatem mataloktsüra Nagaland Staff Selection Board (NSSB) Regulation 2020 parnoki magitzüktsü ta amokmerenogo.

DUDA Guest House nung osangbenertem den sensaksemba mapang tir Sepili L. Sangtam-i anir ENSF lenirtemi ashiba agi, jenjang tapet agitsü ta imlaa parnoki Chief Minister nem anogo tenet latettsüogo. Iba tatembangbuba takhangba ajanga ENSF-i, parnoki NSSB Regulation, 2020 dak sendakba nung September 11 nü ken o ka benokogo aser 2008, 2011 aser 2015, P&AR O.M. Notification, Nagaland Public Service Commission-i mebenokba dak sendakba nung onük trok aser November 18 nü nungi tenzüka anogo tenet tsüingda temalen shisema aliba mapatem agütsütsü akhanger.

Ajisüaka state sorkari jenjang tapet magiba ajanga takhangbatem ataloktsütsü asoshi anogo tenet latettsüogo, ta lenirtemi ashi.

ENSF-isa, Nagaland state kümetli nungi Eastern Naga nungertem lenla ajak nung sentoka arudar, ta ashi.

Lenirtemisa, Indian Constitution Article 16 kübok Equality of opportunity in matters of public employment clause 1 aser 4 nung lisopur ajak

nem office mashi ka nung mapa balala asoshi kasa maongka agütsütsü latetja aliba shisema lir.

NSSB Regulation, 2020 dak sendakba nung CM office nung ken o benokba nung Federation-i September 11 nü onük trok benokogo aser 2008, 2011 aser 2015, P&AR O.M. Notification, Nagaland Public Service Commission-i mebenokba dak sendakba nung onük pezü benokogo, ta parnoki ashi.

NPSC-i aibelenba aika Federation-i potetogo, ta shia parnoki ashiba agi, Combined Technical Services nung Eastern Naga nungertem nem 78.25 posts magütsü. Combined Education Services nung posts 36.5 aser NCS, NPS, NSS aser Allied Services nung posts 25 magütsü mesera meyipsatsüogo.

Anungji ENSF ketdangsertemi ashiba agi, parnok takhangba state sorkari mataloktsüba sülen parnoki NSSB dak sendakba nung onük trok aser November 18 nü nungi tenzüka anogo tenet tsüingda temalen shisema aliba mapatem agütsütsü akhanger.

Iba takhangba mataloktsüra, Federation-i parnok takhangba matalok tashi tanen makai longkak aittsü aser lendongtsüdong kar danga atalokra iba khuret state sorkari abentsü, ta ashi.

ENSF onük trokji yamai alitsü:

Board nung mendenbuba aser züngsem ana densema mapa asemprongla ya tebandang kecha makai kin ajak

nem maongka agütsütsü atema Nagaland nung aliba Naga ki tem tsüingda melentepa inyaksüla.

Tanga Naga ki tem den jenjang kati matu tashi Eastern Naga nunger kin trok (Sangtam, Konyak, Yimchunger, Khiamniungan, Phom aser Chang) nem mapa shilem 45 agüja atatsüla aser jenjang kati atuba sülen asadangshitsü.

Group C mapa koba schedule-A nung shisema lir iba ya NSSB küboki aitdakja preliminary aser written exam aser tanaga Practical/Skill/Physical proficiency aser interview tem department balalai agitsüla.

Police, Prisons, Napland Lokayukta, NPTO, HG/CD and Department of Fire and Emergency Services (Sister Departments) Excise aser EF&CC nung Forest Guards kübok Constable/Fireman Constable/Warder/Female Warder mapa ya NSSB küboki aitdaktsütsüla.

Preliminary aser Written Exam atema tatidangtem district Headquarters ajak nung agitsüla.

Group C (Level 3-7) mapa tazüngtem NSSB nem memetdaksüba department/ketdangsertem merenshitsu atema provision benoktsüla.

Anungji ENSF-i, state sorkar dang Federation-i akhangbatem asadangshitsü mepeshir. Takhangbatem mataloktsüra ENSF-i Nagaland Staff Selection Board Regulation 2020 magizüktsü, ta ENSF lenirtemi metetdaksü.

## Fisheries & Aquatic Resources ajanga training agütsü

**Dimapur, Yimpoksüi/Nov. 19 (TYO):** Department of Fisheries and Aquatic Resources, Wokha ajanga Ralan sub-division, Wokha kübok Liphanyan yimsüng nung angö metsürtem atema anogo ka training November 17, 2020 nü ayongzüka katsü.

Iba training nung District Fisheries officer, Wokha, C. Dory Yanthan, Yitsemo Kikon FD aser Aponthung Kikon FD

nungertem shisalen sayur ama dena liasü.

"Culture and Breeding of Common Carp" onük nung ajemdaker angö metsürtem nem technical tsütsü training ya agütsü.

Liphanyan Village Council, Chairman, Ekonthung Ovung-i sentong tenzüka jembiba mapang, angö metsüba tsütsü scientific yimyatem amshia metsütsü asoshi training agütsüba atema department

dang pelaba lemsatp aser angö metsürtem dang parnok nem maongka agütsüba tajungtiba nung amshitsü ayongzüka liasü.

Iba training agiba ajanga angö metsürtemi angö timba metsütettsü aser ibaji ajanga angö metsürtem ajangzüktsü aser district nung angö agi anünga aliba peritsütsü, ta Ovung-i imlaba lemsatp.

Iba sentong nung angö metsür 31 dena ajangzüka liasü.

### Happy Birthday

**TENÜNG : SENTIRENLA AIER**  
 Tasoba Anogo : Nov 20  
 Küm : 2  
 Talidak : Half Nagarjan  
 Küm 2 tashi na Yisui temoatsü tulu nung len ania arugo. Na tainba akümdang Yisu temeim aser temoatsü meteta akümtsü. Na Tsüngremer nükjldong tongtetsü sarasademer.  
 - Oba, oja aser kinungertem



## Mon nung pua aliba miim mozü raksa indoka



**Dimapur, Yimpoksüi/Nov. 19 (TYO):** Mon jila nung pua aliba miim mozütem November 18, 2020 nü raksa indokogo.

Superintendent of Excise & Prohibition Mon, Khevitu Swu ajanga sangdong ka nung ashiba agi, sen 163,705 jenjang Spasmo Proxyvon Capsules 1891, Nitrosun Capsules tejang 132, Brown Sugar/Sunflower 160, Opium gram 34.98 aser OSD tablets pezü raksa indokogo.

Item temesepba miim mozü ya EAC Mon, Khenpa, District Administration nungi teshimtet nübur, Superintendent of Police, District Session Judge Mon, IPR Mon aser Excise department nungi Inspector

tem matsüingdang raksa indoka liasü.

Item oset ya 2017 küm July 27 nungi 2018 küm August ita tashinung apuba liasü, aser iba mapang ken o 11 tashi zülüokogo.

Item oset raksa meindok tsüingda Superintendent of Excise & Prohibition Office Mon nung sentong tatsüka agi, kong mapa tajung inyakba atema EAC Khenpa ajanga department nem tenüngsang agütsü.

Paisa department dang tarutsü anogotem nunga Mon District nung nüburtem jenjang ajungkettsü atema ozüing alema amshiba osettem aputsü atema mera tali agitsü ayongzüka liasü.

## Totzü jenjang atuba...

(TAPAK1 NUNGI...)

"State sorkari totzü jenjang atubaji state rongsenkettsüng timtem ajanga lir ta tatemtsü ashir, ajisüaka rongsenkettsüng timtem khuretji kechiba nübur nem benloksür? Shidakba agibo, tang ama timtemba mapang ka nung sorkari totzü densema tanga osettem nung jenjang matutsüla, saka khuret pungbadaktsütsü atema saru ajemtsüla. Totzü jenjang atutsü agibo sorkar atema danga lenmang tajungba lir," ta sangdong nung shia lir.

"Tawa NPP Media Cell den interview ka nung jembidang State President NPP Nagaland, Dr. Andrew Aphoto Sema-i, 'minister tem aser ketdangsertem karbo ashishitsüsa lir, kechiyong parnoki kiojen tulu yangluogo, state nung dang masü saka tangalen-a ki tajung den resorts

asere hotels yanglua lir; itemji parnok itasen agi dangbo alizüktsü makok' ta jembia liasü," ta sangdong nung shia lir.

Sorkari industries amenoktsü aser mapa meinyaki aliba industries asüngsashitsü atema inyaksüla, koba ajanga linük rongsenkettsüng asentenshiba dang masü saka zünger mapa mengui alir lanur meyirjang aika nem mapa agütsütettsü, ta NPP-i metetdaksü.

"Anungji NPP Nagaland-i state sorkar dang saru atuba dang nungibo state rongsenkettsüng jenjang tajungba akümtsü atema ang asalentong yanglua inyaksü ayongzüker. Tang ama mapang ka nung state sorkari taitsubatem agizüktsüla aser state nung totzü jenjang ajemtsüla," ta NPP Nagaland State-isa metetdaksü.

## North PS, Kohima nem ISO...

(TAPAK 1 NUNGI...)

Iba certification ngutettsü asoshi teinyaktsütem inyaka aru, aser item rongnung character/passport verifications inyakyim tajungba kuma yanglushiba aser record bendenba aser rizüingba yimya melenshiba dena lir.

Maneni iba police station indang ki-o-jen tajungba kuma yanglushi aser mapang lateta yur ken o balala benteta liasü.

Iba police station nung reception desk ka, Para Legal Volunteers help desk, interrogation cum investigation room temeja ka,

tesemdangertem atema tesem balaka, tajemtsü tzü temürek aser iba ama sapang balala lir.

Onlie application, process, upgradation, documentation aser online auditing mapatem ya anogo 30 nung tembanga liasü.

ISO 9001 ya international standard ka lir, aser yangji quality management system (QMS) atema tenüngdakbatem shia lir. ISO 9000 series nung ISO 9001 ya nungtugutiba standard ka lir aser lokti tentet nem agütsüba standard ji ibai dang lir.



### Akhil Gogoi chioktsü khanga noksa yangluba atema artist 4 sota ayu



Krishak Mukti Sangram Samiti (KMSS) leader Akhil Gogoi indang noksa yangluba atema police-i Brehostibarnü artist pezü sota ayuba noksa nung angur.

**Guwahati, Yimpoksüi/ November 19 (Agencies):** Guwahati kübok Basistha tesem nung apu ka indang wall nung Krishak Mukti Sangram Samiti (KMSS) leader Akhil Gogoi indang noksa yangluba atema police-i Brehostibarnü artist pezü sota ayu.

Mukti Sangram Samiti (SMSS) lenir, Pranjal Kalita den külemi artist tem ya Basistha

Police Station-i anir ao. Artist temi KMSS lenir pusema iba panting yanglua liasü.

Police ketdangsertem iba tesemi oa artist tem dang Gogoi indang painting agintsü atema tetuyuba agüja liasü, ta KMSS-i lenir Mukut Dekai-ashiba sangdong ka ajanga metetdaksü.

Parnoki lenir pusemba den

pa tepuokdak nungi chioktsü atema akhangba sülen parnok Basistha Police Station-i anir ao, ta paisa ashi.

Mapang tatsüka lir artist temi police ketdangsertem matsüngdang iba painting aitokja liasü.

Ajisüaka police source kati ashiba agi, artist tem ya apuba masü saka ken o ashishitsü atema sota ayuba dang lir.

### Union health ministry-i Manipur dangi central team ka yok

**Imphal, Yimpoksüi/ November 19 (Agencies):** Union ministry of health and family welfare-i Brehostibarnü, Covid-19 tashidak menatepa aoba azüoktsü atema local administration nem teyari agütsütsü asoshi Manipur, Haryana, Rajasthan aser Gujarat dangi high level central team tem yokogo.

Item state nung Covid-19 tashidak nisung aika dak potetyonga odar.

India nung tang shiranga alir 44,3303 rongnung Manipur

nung 0.64 per cent aser Haryana nung 4.41 per cent lir. Rajasthan aser Gujarat na 4.39 per cent aser 2.81 per cent lir.

Manipur nung positivity rate 6.36 percent, Haryana nung 6.81 percent, Gujarat nung 3.09 aser Rajasthan nung 6.26 percent lir.

"Item team tem yagi Covid-19 tashidak kanga potetba district tem semdangtsü aser tashidak azüoktsü, surveillance, testing, infection prevention aser control measures amala

inyakyim nung teyari agütsütsü," ta health ketdangser kati ashi.

Central team temisa, mapang shidak nung temang asadangtsü asoshi aser iba sülen maneni inyakyim balala dak sendakba nung tetsükdaksü adokbatem kanga junga achayangtsü atema len sayutsü.

Centre sorkari Covid-19 tashidak keta alir aika potetba state aser union territory temi mapang shia iba la mesükba team tem yoka arudar.

### Kaketshirtemi Kanchanpur nung lenmang mokdanga ayu

**Agartala, Yimpoksüi/ November 19 (Agencies):** School kaketshirtemi Brehostibarnü lenmang mokdanga ayuba den Tripura kübok Kanchanpur nung sub-divisional magistrate's (SDM) office meketbanger longkak ait.

Kanchanpur sub-division nung Bru nung refugee tem lidaktsütsü asoshi telemtetba agiba anema kaketshirtem longkak aita liasü.

Linük wako bener parnoki refugee tem anema yimyim balala ayima liasü.

Iba tatalokba sülen sub-

division nung section 144 benokogo.

Bru refugees temi pump operator ka maka yirutsüba sülen SDM-i, November 17 nüa iba section mapang tatsüka benoka liasü.

Osang ajanga ashiba agi, parnoki yimtsüng ana nung yimdaklirtem amak aser kasa aonung parnok indang osettsüt auyar ao.

Bodhbar anepdang iba section aginba sülen nisung meyirejang aika adenshi aser tashiyim agi sorkar office, school aser tanga institution tem

shibangja liasü.

Kasa mapang nung Joint Action Committee (JAC)-i ashiba agi, pump operator amakba dak sendakba nung parnoki police nem tashishiba ka agütsüogo, ajisüaka tang tashi nung nisung ka danga pua mali.

Sub-division nung Bru nung refugee tem lidaktsütsü asoshi telemtetba agiba anema iba committee yagi October 16 nü iba tesem mapang telatetka makai mokdanga ayutsü telemtetba agi

Political party aikati JMC pusemba metetdaksüogo.



Assam nung osangbener shiba, yintong ka nung alena yur nisung aseme azük, pai Bodhbarnü ashiba agi, pai parnok anema osang agütsüba atema parnoki pa tepsettsü merang. Milan Mahanta-isa, aija alirtemi pa nem teyari agütsürtema maka liasü, ta ashi. Pa maker anogo asemububa aoer saka ken o tejangja agütsü atema police tem pa dang maru, ta pai ashi. Police temi tang tashi nung nisung ka dang pua lir.

### Tarun Gogoi temang tejungtuba makümer

**Guwahati, Yimpoksüi/ November 19 (Agencies):** Taoba Assam Chief minister Tarun Gogoi, shiba tang Guwahati Medical College Hospital nung temang anepaludar, pa temang tejungtuba akümba temaitsü mesayur.

Osang kar ajanga ashiba agi, Tarun Gogoi temang Bodhbarnü nungi tamajungba aküm, ajisüaka Guwahati Medical College and Hospital doctor temi ashiba agi, taoba chief minister temang tamajungba mekümi azüoka lir.

Gogoi ya November 1 nü 10:30 ako nung GMCH-i anir ao. Pa tangula sadema mesashitetba sülen mozükidangi anir ao. Iba masüdang pa anogo 60 mozüki nung temang anepaluba sülen October 25 nü mozüki nungi

yoka liasü. Taoba chief minister dak Covid-19 tashidak potetba sülen August 26 nü pa GMCH nung temang anepalutsü anir ao.

Guwahati Medical College Hospital nung doctor tekui Gogoi temang tanenmakai asadangdar. Taoba CM ya tashi mait aser pa kangabo o mejembir, ta doctor-i ashiba den pa temang takaratiba nung tejungtuba akümtsü imlar, ta ashi.

GMCH doctor temisa video call ajanga AIIMS nung doctor tem den arishi küm 86 tain Congress lenir tejen temang anepalutsü nungdakba indang sensaksemogo.

Assam nung Congress lenir tejentemi Gogoi'er kinungertem den maneni osang agitepdar aser takokba tashi teyari balala agüja arudar.



Manipur, Tamenglong district nung Bodhbarnü security forces tem den khatetpa mapang National Socialist Council of Nagaland - Isak-Muivah (NSCN-IM) züngsem asem yiruogo. Security forces temi telungpur tesepe ka maka liasü. Osang ajanga ashiba agi, Assam Rifles-i Chingmei Kabui (Pungsanmei) yimtsüng anasa aremmin nung NSCN-IM telungpur tesepe ka amak.

### UPPL-i BTC nung kin ajak oshi aser sobaliba wazüka yutsütsü nangzük

**Guwahati, Yimpoksüi/ November 19 (Agencies):** United People's Party Liberal (UPPL) tir Pramod Boro-i, Bodo Territorial Council kübok kin ajak sobaliba aser oshi kümzüka aser wazüka ayutsü asoshi atema meranga inyaksü tenangzükba agütsüogo.

Pramod Boro, shiba UPPL nung maden tsüngda All Bodo Students Union (ABSU) tir liasü, pai par political party ya tanga party dang nungi balaka ta ashi.

Tangla Higher Secondary School playground nung senden amenba mapang ojembidang pai, Bodo Territorial Council nung UPPL-i takok nguar parnoki inyakyim nung ajak nem shilem agidaktsütsü, ta ashi.

Boro-i ashiba agi, lisopur ajak stakeholder kaka ama agizüktsü aser representatives shinga nema tashi magütsütsü aser iba ajanga nüburtem asoshi tapet aser tarak maketba yimsütsüba ka amenoktettsü.

UPPL lenirisa, pa BTC tesem nung aliba nüburtem nem

teyari agütsütsü atema politics nung aden aser pai kodanga pa jenjang mashiyimi mamshitsü, ta ashi.

Boro-i ashiba agi, Bodoland People's Front (BPF) pur nükla agi anünga lir aser ibayongji BTC nung industrial policies aser skill development inyakyim kecha benoka mali.

UPPL lenir-i ashiba agi, par party-i kaketshisatsü peria ngur mapa mongui aliba lanurtem tashi arangtettsütsü atema tanenmakai inyaksü, ajita asünungdang parnoki BTC terenlok asoshi inyakba maparen nung tongtibang shilem agitettsü.

Boro-isa, UPPL puri election kokra parnoki Bodo belt nung school ajak provincialize sütsütsü nangzük.

Tenokdangba agütsür aliba NDFB (P) party lenir Govindo Basumatary-ia iba sentong nung o jembia liasü. "BTC tesem nung yimjung aser telongjem tashi itshidaktsütsü aser terenlok atema lenmang lapoktsütsü asoshi onok mulungteter lir," ta pai ashi.





## TIR YIMYIM YIMOBILEM (EDITORIAL)

DIMAPUR ROGONÜ, YIMPOKSÜI (NOVEMBER) 20, 2020

### Chiyongdaksüba sen meshir

**C**ovid-19 tashidak mena tsübuba agi quarantine center nung amongertem nem chiyongtsü awazüa agütsür-a mali tsübutebpa mapang ka nung, Dimapur nung quarantine center balala nung amongertem nem chiyongtsü awazüa agütsüdaksüba sen ita asem pezü tashi magütsübaji state government-i Covid tongpang nung pei taküm tenla agüja rarartem mezüngshiba mapa ka asütsü. Tongpang nungbo prangpong amer sepaitemji dang masü saka parnok taküm nungdak agütsürtemjia kasasa tongtibangba lir. Aji oda, Covid-19 atemabo sen lenmang tapu balala nungi benden saka tang tashi quarantine nung amongertem nem chiyongtsü agütsüba senbo magütsü ta asüba shisatsü aser inyakyim nungji tebilemdangtsü tuluka lir. Bendanglen nungi nisung meyrirjang aika arur aser government-i itemji anepalu mesüetra tashidak prokshitsü aser lendonga ataloktsü ta angatetba agi, arogo aser lokti aikati tangatetba tajung agi pei sen aser nübo agi tesem balala nung quarantine center aika lapoka anepaluba nguogo. Iba jagi government khuret tuluka pongbadaktsür asütsü. Iba amaji yaritepaka, government-i anepaluba quarantine center-tem nem chiyongtsü agütsürtem nem tang tashi sen magütsübaji tangatetba lia Covid-19 tongpang nung raraba yimya masü. China lima nungi tenzüka alima tesem balala nung Corona virus agi shirangba aser asübatem repranga lia memetetika asen lima tonga arudang, asenok kanga aoksatepogo aser iba taoksaji tang tashi asenok mulungjang nungi moi tsübuteper. Iba tashidak ya menatapa aoba tasüba tashidaka ta sangoktsü nungji, kinungertemia kinunger tsübur aser yimtsür yimertemia yimtsür yimer tsübuba agi yimtaki marudaktsür ta mapang talangka asenok tetsübu tia nung aruogo. Aji oda, tetsübuttsü aser tarendaktsü mapang tamajungtibaji India tesem balala nungi pei kinunger aser chirnurtem Nagaland-i meyipa aruba mapang to liasü. Parnok dakji Corona virus melia alitsü ama kanga tsübua bilem, kechiyong parnokji Corona virus agi atongba tesemtem nungi arurtem liasü. Aji oda, tanü tashi bendanglen nungi arurtembo tashidak kanga junga tendanga tesem balaka nung monger külenang kidangibo anioker. Iba ama tetsübu aser tarendak tia nung bendanglen nungi arurtem anasai aotsübaji tasüi aoer ama bilemba mapang ka liasü. Asen nisung aika bendanglen lir aser parnokji aruner saka tashidak bener aru tsübuba agi asenok aikati marudaktsüner ta atsütepba mapanga ka asenoki ajuruogo. Iba ama mapang nung bendanglen nungi arurtem ki ka nung anioka quarantine süa anepalutsübaji mapa temela masü, shisabolutsü mapa ka liasü. Ano, timtem kaji asenok aikati pei ki anasa aser pei kiyong nung quarantine center lapokdaktsüsüa tsübur, anungji memelunger ta timtem talila aika ajuruba asenoki nguogo. Aji oda, bendanglen nungi asen nisung noklang ta masü saka meyrirjang ta arutsü aser item ajakji, teimbaka, Dimapur nung anizüka quarantine nung mongdaktsür yoktsübaji state government mapa liasü. Atangji, state government-ia bendanglen nungi pei ki bushia arunertem asoshiho akok tashi train anepaluja anir aruogo aser marurtem asoshia senotsü teyari agütsüogo. Ajisüaka, tamakok ka reprangtetbaji state government-i aruagi quarantine center junga anepalu mesüetet. Aiben tesem aika nung state government-i anepaluba quarantine center nung chiyongtsü mapang shitak nung magütsütetba aser chiyongtsü mejungi agütsüba ajanga quarantine nung amongertem jashiba maparen tapu aika atalokogo. Atangji. item timtemji tapi agi adokbabo masü. Shishilembadak ajak shibanga yur nungdak osettem peria mangur aser soruchioka chiyongtsü agütsüsübaji nübo mangur. Ano, külen government-i sen magütsür ta timtem aika ajurur alitsü. Ajisüaka, tatem nungbo, item ajakji kokteta quarantine center ajak tipdema temtetogo. Ibaji kari pei sen endoka chiyongtsü awazüa agütsütetba ajanga lir. Item nemjibo parnokji agütsüba chiyongtsü indang sen kisüngji masü saka tepelaba tamaitüa tuluka sayunütsüka lir, kechiyong parnokjia Covid-19 tongpang nung shilem tajung agirtem lir.

## OLEMSABANG

### TAMAJUNG AGI AJANGZÜKBA RONGSENJI KECHA TAJANGZÜK MALI

-Rev. Maong Lemtur

A.Shin 10:2 "Tamajung agi ajangzükba rongsenji kecha tajangzük mali. Saka temeshiba tasüba nungi kümzüker.

A.Shin 1:11 "Ochi meshi-i meshi-l anguba rongsenji ajema akümtsü; saka züsenba agi terara shibai bendendir, pa züintsü."

Okila: Meimchir taküm alima nung lia aotsü asoshi rongsenji kanga dang nungdak. Saka ochi meshi-l bena aruba rongsenji lending tulu lir. Ochi mashiba lenmang ajanga bendenba rongsen nungji tepela mali, anisüngzüka mali, jangratemtsüa mali, tekzümzüka mali; iba jagi taküm asoshi khuret aser atakatemang bener arutsür. Iba yagi takümü tesama leni anir. Anungji iba ocet ajanga koda ochishia alitsü aser ochi inyaktsü, aser ochi lenmang nungi koda rongsen bendena ketang asütsü iba indang tatsüka asenok den lemsateper.

#### I. Ochi ashibaji Tsüngrem dak keta aliba yimya lir.

a) Asen kibubaji "ochi" Tsüngrem ta Laishiba jagi ashir.

Yohan 14:6 "Yisui pa dang ashi, lenmang atangji aser taküm ni; ni ajanga mesüra shingaia kü Bu dangi marur."

Paji ochi Tsüngrem, anungji pa dak ochi lir. Ochiji Pa dak keta aliba yimya. Pa koma ochi lir, yamaji pa sullen anidakertema ochi nung lidaktsüner.

b) Ochibaji pai asenok dak nungi yimlar

A.Shin 14:2 nung ashir, "Tindangba nung shibai jajar pai Kibuba tsübur, saka pei lenmang nung mashikoshiri pa sembar."

c) Tsüngrem-ji ochi saka mojingji tiyazür.

Shirnoki tiyazü jembir aser inyaker parnokji Tsüngrem nungi masü, saka Mojing nungi lir. Kechiyong Mojingji tetenzük nungi tiyazü tebu lir.

Yohan 8:44 nung Yisui yamai shia lir: "Nenok pei tebu mojing meyong lir, aser nenok tebu jangraba inyaktsü nenoki mulunger. Pa tetenzük nungi nisung tepseter pa dak ochi mali. Pai kodang tiyazü jembidir, pai pei temulung nungi jembir; kechiaser pa tiyazü, aser tiyazü tebu"

#### II. Ochi-ji Tsüngrem-i asenok dang nungi akhanger.

a) Ochi benshitsü Tsüngremi asenok dang nungi akhanger.

A.Shin 14:2 nung yamai ashir, "Tindangba nung shibai jajar pai Kibuba tsübur saka pei lenmang nung mashikoshiri pa sempar."

b) Tila nung temulung lemtetsüsa alitsüla.

Luk 16:10-11 nung ashir: "Shibai kanga tila nung temulung lema lir, pa dak jenti nunga temulung alemtsü; aser shiba kanga tila nung temulung lema mali, pa dak jenti nunga temulung malemtsü. Anungji tiyazü rongsen nung nenok dak temulung melemra shibai atangjiba rongsen aytusü nenok dak temulung alemtsü?"

c) Kodang ochi mashi ajanga na tendangdir, Tsüng dangi meyiptsüla.

Tsüngrem tanela nem na bendanga yujang.

Gal. 5:16-17 "Saka nenoki Tanela agi jajang, aser nenok shi jangraba mataloktsüsü ta ni ashir. Kechiyong shi-i jangrabaji Tanela anema aser Tanelai jangrabaji shia anema, kechiaser iba anaji anemer; anungji nenoki kechi inyaknür meinyakteter."

d) Ochishir den medemang:

A.Shin 29:24 nung ashir: "Shibai auür den medemdir pai pei taküm sempar, pai atakatembaji angashir saka kecha mejembir."

e) Ochi meshi-i anguba jaka meyipa agüjang:

Aseni ochi meshi-i rongsen kar bener arua lira, aji shir nem agütsüsü tim par nemji meyipa agüjang ta ashir.

Lev. 6:4 nung ashir: "Idangji ya oda alitsü, pai temenen menaa lira, aser tai lira, pai rakzükratema agiba mesüra pai tashiyim agi bena aruba oset, mesüra pa ket nung ayutsü agütsüba oset, mesüra tesamaba oset pai anguba, itemji pai meyiba agütsüsüla.

#### III. Ochi inyakba nung temoatsü lir, saka ochi mashiba nung atakatem lir.

a) Ochi shia inyakba nung Tsüngremer temoatsü tenangzükbatem lir.

A.Shin:2 "Kechiyong mashikoshi nisungji kibuba tsüngdang tesembatsü lir, saka tindangerterji pai temulung lemteta lir."

b) Ochi shia alib ajanga kibong nunga temoatsü lir.

A.Shin 20:7 nung ashir, "Temeshi nisung shibai pei tangatetba nung jajar, pa sullen par chirji temoatsü."

c) Ochi shia aliba takümü rongsen nunga jenti moatsür.

A.Shin 15:6 "Temeshipur kidang rongsen jenti lir; saka tamajunger tajangzük aruba nungji timtem lir."

d) Tsüngrem nungi pilaa aoba nung atakatem lir.

A.Shin 3:32 nung ashir: "Kechiyong mashikoshi nisungji Kibuba tsüngdang tesembatsü lir, saka tindangerji pai temulung lemteta lir."

e) Kibong nung timtem bena arur.

A.Shin 15:27 "Tiyazü tajangzük asoshi merumerui pei kibong timtemdaktsür; saka süpokrem sempadir pa taküm alitsü."

f) Ochi mashirji anünga altisü.

A.Shin 1:11 "Ajongben anguba rongsenji ajema akümtsü; saka züsenba agi terara shibai bendendir, pa züintsü"

**Otem:** Asen putu mapang nunga asenoki kuli tejangja aika ngua arutagi. Shirnoki ochi meshi-i rongsen bendentsü merang parnok aika taküm samaogo. Taküm liaka parnok aika rongsen samatokogo. Ochi mashi lenmang ajanga bendenba nungji kecha tenzükshitsü mali. Mangatetba mapang nung aibelena inyaka alinung asenoki tatok meshidi aser mapang ajak nung ochishia alitsü merangdi. Ochi mashi mapa inyaktsü melena meranga och ishia inyakdi aser asen taküm aser mapa ajanga asen teyanglur Tsüngrem peladaktsüdi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**



## Missionary tem atema sangküm Khristan airlines ka tenzüksü



2021 küm Khristan airline akümtsü aliba Judah 1 indang tayimtsütem noksa nung angur.

**November 19, 2020:** Tajangzük mebushiba ministry kati tang mezüing Khristan airlines ka tenzüksü, aser alima tesem balala nung Yisu Khrista osangtajung proksü atema item tayimtsü nung missionary tem senzüksü, ta osang ka ajanga metetdaksü.

Shreveport, Louisiana nung aliba Shreveport Regional Airport nung amenoka aliba Judah 1 indang tayimtsütem nung mission fields aser lendong atalokba tesemtemi aoer missionary tem belener aser sangküm nungibo Judah 1 indang tayimtsütemji Khristan airlines akümtsü.

Interview ka nung jembidang Judah 1 Tir aser CEO, Everett Aaron-i, "Sangküm nungi Judah 1 nija akümtsü aser airline standard akümtsü," ta metetdaksü.

Judah 1 indang Federal Aviation Administration certification alitsü aser kanga nungtugu arilines- Delta ama akümtsü. Tang linük nung missionary tem belentsü atema ministry-i tayimtsü tilatem amshir, saka sangküm küm tatabanglen tashi nungbo nisung 100 tashi mentetsüsa tayimtsü tulu amshitsü.

Aaron-i, "Sangküm küm tatabanglen tashi nungbo onoki tayimtsü tulu asem-pezü shi amshitsü. Onoki Boeing 767-200ER ka alizükogo aser iba nungji nisung 238 mentetter aser lenmang tom nung khen dang anenzüka alima tesem mashie kati otetsü akok. Iba tayimtsü nung khu touzük ton 30 tashi bentetsü," ta metetdaksü.

Judah 1 Khristan airlines aser tanga airlines na balala süaka US aser alima tesem ajaklen iba airlines nungtugu akümtsü, ta paisa ashi.

"Onoki tayimtsü senzüksü atema mapang lateta mayutsü aser tayimtsü lenmang atema temelaba meshitsüsa makümtsü. Iba tetezü onoki onüba tesem mashie kati otetsü akok mesüra mapang lateta mayutsü," ta pai metetdaksü.

Judah 1 airlines nung missionary tem dang nungi parabo meshitsü saka khu abenba atema sen magitsü, anungji missionary tem khu abenba ajak angati asütsü, ta pai ashi.

Khristan airlines mezüingbuba- Judah 1 ya coronavirus wara mapang nung tenzüksüsa akok, aser iba dak sendakba nung CEO, Aaron-i, "Onoki onok indang tayimtsü kanga junga sanitize asür. Tayimtsü nung mesen shilem 99.9 tashi tepsettetba machine ka lir. Tayimtsü senzüba shia sanitize asütsü aser machine ji amshitsü," ta ashi.

"Iba airline-i tangar dang nungi maongka balaka angur, kechiyong onoki meimchirtem atema temeim mapa inyaker. Shibanga aliba linüktemi aotsü atema onok nem temelaba agütsür," ta pai ashi.

Yaküm Operation Blessing nungi team ka Bahamas-i oa Hurricane Dorian agi kongshirtem nem teyari balala agütsüba maparen nunga Judah 1-i yaritepa liasü.

Aaron-isa, Guatemala, Nicaragua aser Honduras linüktem nung teyari agütsüsa atema Judah 1-i Operation Blessing den külemi inyaksü sentong lir.

Judah 1-isa Samaritan's Purse aser Eagle Mountain Arogo den-a külemi inyaksema aruogo.

Aaron-i ashiba agi, tang Judah 1 indang tayimtsü pongu lir; item rongnung Westwind tayimtsü densema lir, aser iba tayimtsü nungji doctor tem mesüra missionary team tila mission field balalai anir aoer aser sensaker linüktem nunga tesem aika nung anentetter.

Judah 1 indang tayimtsü Cessna 414 nung yirua alirtem belener aser disaster relief mapa inyaker; iba tayimtsü nung passenger trok tashi dang menteter.

Judah 1 indang tayimtsü tulutibaji MD83 lir, aser iba tayimtsü nung nisung 120 tashi

menteter aser khu pound 17,000 tashi benteter.

2015 küm YouTube video ka ajanga Aaron-i, 1994 küm Tsüngremi Pa wadang atema tayimtsü amshitsü asoshi pa nem mangdang agüja liasü, ta metetdaksü.

Tsüngremi pa dang mangdang sayuba pai lemsatepa, "Item tayimtsü nungji chiyungtsü, medical supplies aser Laishiba bona liasü," ta ashi.

Küm 30 jakedang Tsüngremi Aaron dang Judah 1 mangdang mezüing sayu saka 2011 küm nung ang iba mangdang atangji ataloka liasü.

## ANO GO ABEN TSÜNGREM DEN

### Kibubai mesotsü lenmang

"Tamang sarasadem agi shirangbaji aneptsü, aser Kibubai pa mesotsü; aser pai temenen alinunga aji pa dang adoktsü" Yakob 5:15

Timtem toudhi aser tatidang ajangshidang asenoki kechi nung aser shiba dak jenoktsü bilemer? Aiben asenoki ali rongsen aser nisung tashi-i akoktsü ta bilemer. Asenok asoshi telangzübaji Tsüngrem tashiji magütsütsü. Asenok asoshi telangzübaji Tsüngrem tashiji lir. Adangji, Tsüngrem indang telangzübaji angutsübaji, asenok dak sarasadem tashi alitsüla. Tsüngremi asenok ajaba mapang, mesüra asen taküm tendangba mapang, asen dak kongshitsüsa aser asen taküm yanglushitsüsa alitsübaji, Tsüngrem tashi agi dang akoktsü. 2 Chubatem 20 nung chuba Hezekia tasütsüsa shiranga liasü, saka pai Tsüngrem tsüngdang apudaka, nüktzü alua pa arishi aser tashitak aneptsü asoshi sarasadem, adangji Tsüngremi chuba Hezekia sarasadem langzü. Chuba Hezekia nem küm 15 süklöktsü aser ano tsükchir Assria ket nungi kümzük.

Asenoki tamang sarasadem agi Tsüngrem dang akangtsüla. Saka atsüayongya, azümesena, ratamata tamangi Tsüngremer telangzüba mangutsü. Tamang madenba sarasademji "mopung nung temaleni ona atuba tzüsem ka ama dang lir. Kechi agi asenok shiranger? kechi tashitaksa lir asenoki meteta lir, arung, Tsüngrem dang tamang ai aneptsü meshidi.

#### Sarasadem

Temeim Tsüngrem! Ne tamang sarasadem onoki akhanger aser onok nem iba sarasadem ajanga temelenshi agüjang. Amen.

## Mission Cry-i Albania linük nem Laishiba 27,000 agütsü

**November 19, 2020:** Albania nung Arogotem den külemi inyaksema telok- Mission Cry-i Albania nung Arogo tasen tenzüksürttem den yariteper aser parnokisa Communist linük, Albania nem Laishiba 27,000 agütsüo.

Osangbener den jembidang Mission Cry Tir, Jason Woolford-i, "Mission Cry-i iba maparen (Laishiba yokba) nung tetsükdaksü malitsü atema kaket dak sendakba maparen ajak inyaka liasü. Onoki nüburtem dang sarasademang ta ashi aser iba maparen nung onoki tetsükdaksü kecha majuru, kechiyong Tsüngremi mapa inyak," ta metetdaksü.

Woolford-isa, Albania nung tamangertemi Laishibatemi nguogo aser parnoki tang Tenla ki ka tesüdak lir aser yangji Arogo tasen tenzüksütsü atema

inyakdar, ta metetdaksü.

Alima nung Tsüngrem dak mamangba mezüingbuba linükji Albania lir ta züingshir, ajisüaka iba linük nung Khristan yimsü indar.

Albania nung Muslim nung nüsüng timba lir, saka iba linük ya Communist linük ka lir.

Iba linük nung küm aika Khristan aser Muslim nung anema inyaka aru; jail nung puok, putirtem tepset aser tamanger kibongtem reshikangshia liasü, ajisüaka tamangertemi mimshia pei tamangba yimsü medoktsüi aruogo.

"World War II tongbang anenba sülen Communist yimsüsüba aru aser onok indang (tamangba yimsü) professors aika khaset, tepuokdak ayu, aser parnoki Khristantemji shiruru ama züingshia liasü," ta Albania Catholic Arogo nungi putir, Ernest Simoni Troshani-i

metetdaksü.

Khristantem reshikangshiba ajanga Mission Cry teloki linük nung Khristantem yaritsü atema telemtetba agia liasü.

Tsüngrem atema tongbang arr sangoktsüba ama Mission Cry telok ya taoba mapang Marine Drill Sergeant-i tenzükka liasü aser Tsüngrem atema tongbang nung nokdaksü asoshi Laishiba yoktsü atema pai Mission Cry tenzük.

Mission Cry-i 1956 küm nungi tenzükka alima tesem balalai Laishiba yoker.

Mission Cry indang website nung shia aliba agi, "Mission Cry-i lajartem, sayutsüingirtem, pastor tem aser missionary tem yarir aser distribution centers lapoktsüba den kaketnang agütsür, Bible College nung kaketnang atema teyari agütsür aser crusades ayonga agir."

## ICC-i Burma nung pastor aser missionary 53 nem teyari agütsü

**Washington D.C, November 19 (Agencies):** Taküm September ita nung Myanmar Baptist Churches Union (MBCU)-i International Christian Concern (ICC) dang, MBCU kübok Arogotemi pastor aser missionary tem nem joko itasen magütsütster, ibayongji Tsüngrem tenzükertem kanga timtemer, ta metetdakja liasü.

Coronavirus wara ajanga

Arogo züingsemtem aika mapa makai aküm, ibayongji Arogotem nem tenla magütsütetba ajanga toklang tenzükertem nem itasen magütsüteter.

Buddhist yimsü amanger nüsüng timba aliba Myanmar linük nung Arogo aikati senotsü agi pastor tem meyariteter, iba denji külemi tang wara ajanga ano tamajungba kümogo.

Talisa Yangon area tezülen agiba tesemtem nung Arogo

züingsemtem aika sensakertem lir, iba denji külemi tang wara ajanga pastor tem kanga timtemer. Arogo aikati mission mapa anenogo aser missionary tem nem itasen magütsüteter.

MBCU-i ICC dang pastor aser missionary 53 kanga timtemer ta shia teyari meshia liasü. Ajoda ICC-i parnok nem ita ka piyong chiyungtsü agütsütsü nangzükka teyari agütsüo.



**OLONG PAITEP # 5645**

	1		2			3		4		5
6								7		
					8		9			
			10							
11										
				12						
13		14		15						16
17							18			

**TIPIEN**

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S \_ \_ \_ \_ - (4)
- 13. Yagi ajak ashiochtsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

**LANGTSÜNGLEN**

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. \_ \_ \_ hi - (3)
- 16. Akümüli nungi pilar - (3)

**OLONG PAITEP # 5644 TELANGZÜBA**

**TIPIEN :**

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

**LANGTSÜNGLEN :**

- 1. Tenükjang, 2. Luden, 3. Kiochtsü,
- 5. Lenti, 7. Tajangzük, 11. teronem,
- 12. Sempa, 13. Jahaz.



**ALOKBA KINUNGTSÜ YIMRA AGI TONGER TENA JOKA NUNG SENSAK ASEMER :**

**Kinungtsü :** Tambu, ni tang shirangba ya yimra masü Corona alitsü amaia ya.!

**Alokba :** School tsungtsüng atemba-a mangashi school ki-a mangu class A-a mazüng sür kua nai koma sür aji shitetter?

**Kinungtsü :** Hai! tambu, ni Teni agi kecha memenemtetter aja ya!

**Alokba :** Hemm... ni tentangtsü'ar.  
*Ajisür Kinungtsü tu Joka nungji mejanga or lia Alokbai mi tilaka apu aser Mersü takong eshika agizüker mimong nungji paoka doktsür ki ajak temalen nungi shibanga doktsü. Kinungtsü tu kangasa hajia nemnema sak idangji Alokba yakta ki lapoka tur na Teni shitak lir, Corona masü ta jangjaogo.*

**Kinungtsü :** Oh Alokba!

Lilir : WhatsApp

**TANÜBO NAI LANGZÜANG**

Q. PLI scheme kübok sector koba aiter?

- A. Food Products
- B. Pharmaceuticals drugs
- C. Telcome and Networking Products
- D. All the above

(Taruba adok nung onoki langzütü)

**YASHI ADOK TELANGZÜBA :** November 12

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

**Tepela Tasoba Anogo**



- 1. Tenüng : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**NAI-A YA METETTER MA?**



October 18 2020 nü China nung Ren Keyu arishi küm 14 ajungba den külemi tailonglong tebur rongnung tar talangtiba ta asadangteta pai Guinness World Records title ka nguogo. Ren tar cm 221.03 (süklep 7 ser inch 3.02) lir.

**SUDOKU # 5686**

8	1	9	2	6	5	4	3	7	8	5			1	7
5	3	7	9	1	4	8	2	6	1			8	5	9
2	6	4	7	8	3	5	9	1	9	5			6	3
1	4	8	3	5	9	6	7	2	4	6	3	8	7	9
9	7	6	8	4	2	3	1	5	8	2				4
3	2	5	6	7	1	9	4	8		7		2	4	8
6	9	2	1	3	8	7	5	4	7	5	9	2	8	
7	5	3	4	2	6	1	8	9		8	7	3		1
4	8	1	5	9	7	2	6	3	6				8	2

**TELANGZÜBA # 5685**

**OJANG LUTEP # 5233**

- BEAIN : [ ][ ][ ][ ][ ]
- JBIEMR : [ ][ ][ ][ ][ ][ ]
- ASTHI : [ ][ ][ ][ ][ ]
- NGAMARA : [ ][ ][ ][ ][ ][ ][ ]
- ZÜNTEMG : [ ][ ][ ][ ][ ][ ][ ]
- GAI : [ ][ ][ ]
- ELAMBA : [ ][ ][ ][ ][ ][ ]
- AAM : [ ][ ][ ]
- MNSHITERESÜ : [ ][ ][ ][ ][ ][ ][ ][ ][ ]
- LANDAG : [ ][ ][ ][ ][ ][ ]

**OJANG LUTEP TELANGZÜBA # 5232**

TANISHIR SHIBAI TAJAK DANG REPRANGA LOKTI  
 KAJI ANITIR TARUTSÜ AYATAI

**TAN HOPTA ATEMA - KOMA SÜLA ?**

Q. India temzüng nung arla 370 agiener Jammu & Kashmir state agi Union Territory-ang ana kümtsüba ama, arla 371 A ya agiener, Nagaland state yagia Union Territory-ang ana kümtsü nunga koma süla ?





Jammu, November 19, 2020: Brihostibarnü Jammu nung kiralongrar pezü kasetba sülen parnok indang prangpong aser injang sayuba noksa nung angur. Brihostibarnep Jammu kübok Nagrota area nung kiralongrartem aser sepaitem na tsüngda khatepa liasü.

### Centre-i state tem den mejembitepi CBI yoktsü makok: SC

**New Delhi, Yimpoksüi/ November 19 (Agencies):** State sorkartem den mejembitepi CBI-i state tem nung bushisüngdangtsü makok, mesüra Centre sorkaria state sorkar dang nungi temelaba magii CBI yoktsü makok, ta Supreme Court-i metetdaksü. Uttar Pradesh nung ochimashi ken o nung tai tonglokja aliba ketdangsertemi temepishiba ken o agütsüba angadanga sülen Supreme Court-i, "Ozüng nung, state den jembitepsüla aser Centre sorkaria state dang nungi temelaba magii CBI

meyoktsüla. Iba ozüngji linük temzüng den sendaktepa lir," ta metetdaksü. Opposition party temi yimsüsüba states - Rajasthan, West Bengal, Jharkhand, Kerala, Maharashtra, Chhattisgarh, Punjab aser Mizoram nung CBI-i bushisüngdangtsü atema temelaba meshitsü thinentsüba den iba oshidang ya sendaktepa lir. Supreme Court nungi judge ana- AM Khanwilkar aser BR Gavai nati Delhi Special Police Establishment (DSPE) Act nung ajemdaker iba oshidang agütsü.

2019 küm August ita nung Fertico Marketing & Investment Private Limited dak sendakba ken o ka nung Allahabad High Court-i obendang agütsüba anema temepishiba ka angadanga sülen SC-i iba obendang agütsü. CBI-i ajungbena Fertico factory mita aoba mapang nung koilaji Fuel Supply Agreement kübok bener aru aser ibaji black market nungi, ta metetba sülen CBI-i ken o ka benoka liasü. Iba ken o nungji District Industries Centre nungia ketdangser ana densema lir, ta jangjaa liasü.

### BJP-i West Bengal Assembly election 2021 atema asalentong tenzükogo

**New Delhi, November 19 (Agencies):** Tawa Bihar Assembly elections nung takok anguba sülen Bharatiya Janata Party (BJP)-i West Bengal nunga Mamata Banerjee-i aniba Trinamool Congress sorkar atsüngdoktsü nükjidong nung asalentong yanglu tenzükogo. West Bengal nunga assembly election nüboyim nung tongtiji Ato kilonser, Narendra Modi südaktsütsü aser Centre sorkari West Bengal nung terenlok mapa inyaktsüba sangdonga election atema

nüboyimtsü. Union Home Minister, Amit Shah-i ita shia West Bengal semdangtsü aser BJP National Tir, JP Nadda-ia ita state semdangtsü. BJP-i, party nung booth level workers-i meranga inyakba atema tenüngsang agütsür, talisa Ato kilonser, Modi aser Home Minister, Amit Shah natia party nung booth level workers-i kanga meranga inyakba agi party-i elections nung takok angur, ta shiogo. Anungji West Bengal nung booth level nung

inyakertem tashi itdaksütsü atema party-i inyaktsü. BJP-i West Bengal nung assembly menden 294 ji zone 5 kuma lemsaogo aser zone shiaji National officers kaka nem lezmüktsüogo. Zone 5 nungji National officials-i Bengal nungi party MP tem, MLA tem, District Tirtem, taoba mapang District Tirtem, District Incharge tem aser booth Tirtem den tongtepratepa inyaktsü aser National officials ajaki BJP Tir, JP Nadda nem report agütsütsü.



New Delhi, November 19, 2020: Brihostibarnü New Delhi nung BJP lenir, Vijay Goel leniba nung party nung inyakertemi Delhi nung mopung menenba aser coronavirus case timba akümba atema sorkar anema longkak aitba noksa nung angur.

### Health Workers aser teintet rogo nem tama Vaccine agütsütsü: Harsh Vardhan

**New Delhi, Yimpoksüi/ November 19 (Agencies):** Coronavirus vaccine shilem kuma lemsar agütsütsüji tim dang, ta shia Brihostibarnü Union Health Minister, Harsh Vardhan-i, kodang coronavirus vaccine ngudir healthcare workers aser arrshi küm 65 dak temapurtem nem tama vaccine ji agütsütsü, ta metetdaksü. FICCI FLO-i 'The Shifting Healthcare Paradigm During and Post-Covid' onük nung ayongzükba webinar sentong nung jembidang Health Minister-i, taruba ita ishika tsüngda coronavirus vaccine angutsü, aser sangküm July-August ita tashi nungbo linük nung nisung crore 25-30 shi nem vaccine dose 400-500 agütsütsü ta asadangtetogo, ta metetdaksü. "Vaccine lemsar agütsütsüji tim dang. Coronavirus tongbang tejaklen nokdakertemji healthcare workers lir ta asenoki meteta lir, anungji parnok den külemi arrshi küm 50-65 dak temapurtem nem tama iba vaccine agütsütsü," ta pai metetdaksü. "Iba sülen tashidak balala agi

shiranger arrshi küm 50 dang nungi tekübokpurtem nem iba vaccine agütsütsü. Item ajakji scientific tsütsülen nungi mongintemi lemteta liasü. Onoki iba atemaji asalentong tejangja yangluogo. Sangküm March-April nung teinyaktsü mapatem atema onoki tang nungi jelia sentong yanglu tenzükogo," ta pai metetdaksü. India nung tesüiba ghonda 24 tsüngda ano nisung 45,576 dak coronavirus tashidak putetba sülen linük nung coronavirus case ajak agibo 89,58,483 jungogo, ta Brihostibarnü Union Health Ministry data ajanga metetdaksüogo. Tesüiba ghonda 24 nungsa linük nung coronavirus tashidak agi nisung 585 asü, aser iba tashidak agi asür ajak agibo 1,31,578 jungogo. Serum Institute of India indang Oxford vaccine shilem tasembuba tendangdar aser kobi melii tembangtsü aser linük nung Bharat Biotech aser Indian Council of Medical Research (ICMR) nati yangluba vaccine candidate-a tasembuba shilem tendang tenzükogo.

### Anogo asem tsüngda Bihar Education Minister-i menden toktsü



Mewa Lal Chaudhary

**Patna, November 19 (Agencies):** Ochimashi ken o nung tai tonglokja alisang, Mewa Lal Chaudhary Bihar sorkar tasenba nung Education Minister shimba ajanga mangatetep ken o tulu adokba sülen Brihostibarnü pai Minister menden nungi anenogo. Nitish Kumar-i aniba Cabinet tasenba nung tenangzükba agiba sülen anogo asem dang lirbo pai minister menden toktsür. Hombarnü Raj Bhavan, Patna nung Chaudhary-i tenangzükba agiba sülen Mongolbarnü pa nem Education portfolio lezmüktsü, aser Brihostibar nikongdang 1:00 ako nung pai office mapa agizükba sülen mapang tatsüka dang lirbo pai Minister menden nungi anenba shidi agütsü, ta osang ka ajanga metetdaksü. Chaudhary ya Chief Minister, Nitish Kumar-i aniba JD(U) nungi lir. Tamalen Bihar Agricultural University, Bhagalpur nung Chaudhary ya Vice-Chancellor inyaka liasü, aser iba mapang nungji University nung

tesayurtem aser technicians shimba nung ochimashi inyakba ken o nung tai tonglokja alir nisung pongu rongnung pa densema lir. Pai Chief Minister, Nitish Kumar ajurua senden ka amenba sülen pai minister menden nungi anenba shidi agütsü. Raj Bhavan sangdong ka ajanga, Chaudhary-i menden nungi anentsü shidi agütsübaji Chief Minister tetuyuba nung agizükogo, ta metetdaksü. JD(U) nungisa Building Construction Minister, Ashok Chaudhary-i Education ministry repsema bena atatsü, ta kasa sangdong ajanga metetdaksü. Chaudhary-i minister menden nungi anenba sülen mapang tatsüka tsüngda RJD lenir, Tejashwi Yadav-i, chief minister-i par cabinet nung ochimashir ka aniok, ta aitsü. Yadav-i twitter ajanga, "Nai (Nitish Kumar) metetsümonga ochimashir ka minister kumdaksü, taitsüba aika liaka nai pa nem tenangzükba agidaksü. Aibelensangji tangar masü na (Nitish) dang lir," ta aitsü.



## Thai PM-i longkak aiter anema ozüing ajak amshitsü amokmeren

**Bangkok, Yimpoksüi/Nov. 19 (Agencies):** Thailand ato kilonser menden nungi atsüingdoksü aser King Maha Vajiralongkorn indang tashi aziüoktsü atema longkak aitba tali tesashiba akumba mapang Ato Kilonser Prayuth Chan-ocha-i longkak aiter anema ozüing akokba ajak amshitsü, ta Brehostibarnü amokmeren.

Iba yongji alima nung yimsüsür mezüingmeshiba atema ozüing tesashitiba yanglua aliba maneni benoka amshitsü akok, ta activist temi khuret bena bilemstür.

"Prayuth-i nüburtem anema tongpang ayongzükogo. Sorkar mapa nung alirtem shirnok tang tashi telok ka dena maden ali, nenoki tesüiba mapang ama alitsü asü onok den külemi tarutsü tia yangertsü, aji shimtsüla," ta rights lawyer aser longkak aitba lenir Arnon Nampa-i ashi.

July ita nungi longkak aita aruba ya Thailand yimsüsür atema khuret tulutiba kümogo aser yimli nung ketdangser aitsüba meshi ama mapang talangka nungi züingshia aruba raksa, kong küm 15 tashi tepuokdak ayutsü shia lir.

Mongulbarnüa police indang headquarters nung longkak

aiter nisung meyirijang aika adenshia sentsü balala nüshitsüba sülen anogo ka lir Prayuth-i iba osang ya sangdong. Mongulbarnü longkak aitba mapang police temi tear gas aser water cannon amshidang nisung aika yirua liasü. Longkak aiter kari yimten yimsüsür anema noksa balala yanglusatsü.

"Tensa tajungba makumer. Azüdokshi tali adoktsü jenjang ka nung lir. Ibai maziüokra, linük aser asenoki teti meima aliba chuba yimli raksatsütsü," ta Prayuth-i sangdong ka nung ashi.

"Sorkari mera tesashiba agitsü aser ozüing ajak aser arlla ajunga amshia ozüing raksaba longkak aiter anema mera agitsü."

Saka pai criminal code indang Arlla 112 dena alia maliar mashi, koba ajanga chuba yimli mesüingmeshiba nokdang. Chuba-i mepishiba ajanga tangbo iba ozüing ya mamshir, ta Prayuth-i küm tetenzüklen shia liasü.

Iba arlla nung aibelenertem nem temerenshi agütsütsü atema July ita nungi police temi kuli bendena arur, saka mera kata magi, ta police osang ka ajanga ashi.

Bodhbarnü longkak aitba mapang chuba yimli anema noksa balala yanglutsüba tejashi nung chuba busemertemi Arlla 112 ya amshitsüla, ta social media nung prokshia liasü.

Ita ishika tsüingta tejangja lenir timba densema longkak aiter aika puogo, saka chuba aitsüba asoshi masü.

2014 küm mitkar tashi amshia sorkar atsüingdoksü sülen Prayuth lenisüba kübok chuba mesüingmeshiba ozüing agi nisung 100 jungnüa merenshiogo, saka 2018 küm sülen shinga merenshia mali.

Civilian ato kilonser ka ama yimsü asütsü mechi taoba küm Prayuth-i sentong yanglua election agi, ta longkak aiter temi aitsür. Saka pai aibelena inyakba mapa kecha meliasü, ta ashir.

Chuba yimli indang rongsen ketdangsuba atema Crown Property Bureau nung November 25 nü longkak aitsü setong tuluka ayongzüka lir, kechiaser yimli indang rongsen ya chubai pa meyong ama amshi. Iba rongsen ya sen dollar billion aika jenjang, ta asadangteta lir.

Iba sülena anogo tenet longkak aitsü, ta longkak aiter temi ashir.

## South Asia nung COVID-19 cases million 10 ajunger

**Yimpoksüi/November 19, 2020 (Agencies):** South Asia sub-region nung COVID-19 tashidak agi Brehostibarnü tashinung nisung million 10 dak tema menepogo, ta Reuters ajanga asadangteta lir, kong India temaba jenjang nung lir aser Diwali benjongmung ajanga tawa iba tashidak putetba tsütsü ajema akumba raksatsütsü akok, ta ketdangsertem khuret abener.

South Asua nung India, Bangladesh, Pakistan, Bhutan, Nepal, Maldives aser Sri Lanka lir, aser aliba nung coronavirus tashidak agi menepa aliba shilem 18 aser asüba shilem 11

iba region nungi lir, ta Reuters ajanga asadangteta lir.

COVID-19 cases million 10 ajangba sub-region rongnung North America sülen ibai alitsü.

Alima nung aliba nütsüing yongsük shilem 23 bo South Asia linüktem nungi lir, kong nisung billion 7.59 lir.

Alima nung iba tashidak agi tesashitiba kongshiba linük ter rongnung Asia nungi India ya dang lir, aser sub region nung iba tashidak jangjatetba aser asüba shilem 90 iba linük nungi lir.

Tawa India nung anogoshi iba tashidak putetyonga aruba ajema liasü. Taoba hopta

anogoshi nisung 39,500 shi dak iba tashidak puteta aru, aser September ita tiyonglen anogo tenet asadangba nung anogoshi nisung 92,890 dak iba tashidak jangjateta liasü.

India anüdoklen kidanger Bangladesh linük ya aliba nung aben süoshi yangluba linük tulutiba rongnung China sülen lir, aser South Asia nung coronavirus agi tesashitiba kongshiba linüktem rongnung tanabuba jenjang nung lir, kong nisung 438,000 shi iba virus agi meneper lir.

South Asia region nung iba tashidak agi nisung kata masüba linükji Bhutan ya dang lir.



South China nung Hainan Province kübok Baoting Li and Miao Autonomous County nung aliba Baoting Middle School nung November 18, 2020 nü kaketshirtemi bamboo dance tetoktepba nung shilem agiba noksa nung angur. Baoting Middle School indanga art festival nung shilem ka ama Bodhbarnü bamboo dance tetoktepba agia liasü. Linük nung sobaliba senmang mesamadaktsütsü mechi 2003 küm nungi Baoting nung aliba kaketshirtemi bamboo dance ya angazükdaktsür.

## Hafiz Saeed küm ter tepuokdak ayutsü

**Lahore, Yimpoksüi/Nov. 19 (Agencies):** Pakistan nung kiralongra anema amenoka aliba court kati Jamat-ud-Dawa tekolakba, Hafiz Saeed den dangar asem tashi ozüing alema senotsü teyari agütsüba ken o nung küm ter tepuokdak ayutsü Brehostibarnü obendang agütsüogo. Court ajangasa Saeed indang ki-o-jen ajunga soita ayutsü totuyuba agütsü.

Mumbai nung kiralongra mapa inyakba sentong yanglusang Saeed ya UN-ia kiralongrar ta tenüing jalokja lir aser US-i pa kolak atema sen million \$10 agütsütsü nangzüka lir, aser pa ya kiralongrar nem senotsü agütsüba ken o ana nung taoba küm July 17 nü apu. Iba ken o nung ajemdaker antu-terrorism court kati February ita pa küm 11 tepuokdak ayutsü obendang agütsü lir. Pa ya Lahore nung tanüker kanga sashia aliba Kot Lakhpat jail nung yua lir.

"Lahore indang Anti-Terrorism Court (ATC) ajanga Brehostibarnü Jamat-ud-Dawa tekolakba Hafiz Saeed densema lenir pezü tashi ken o ana nung aija temerenshi agütsü," ta court ketdangser kati ashi.

Saeed aser pa den yariteper ana - Zafar Iqbal aser Yahya Mujahid - ya küm ter ser

tesadang tepuokdak ayutsü obendang agütsü lir, aser Jamat-ud-Dawa tekolakba tenu kinungtsü Abdul Rehman Makki ya ita trok tepuokdak ayutsü obendang agütsü.

"Anti-Terrorism Court No. 1 indang Judge Arshad Hussain Bhutta-i Counter Terrorism Department ajanga benokba case No. 16/19 aser 25/19 angaogo aser Naseeruddin Nayyar aser Mohammad Imran Fazal Gul Advocate nungertemi kuli agütsüba junga asadanger obendang agütsü," ta ketdangser temi ashi.

Jamat-ud-Dawa lenirtem anema Counter Terrorism Department ajanga ken o 41 benoka lir, aser item rongnung ken o 24 jembiogo aser tanüingba ya ATC court tem nung ano mejembi lir.

Tang tashinung Saeed anema ken o pezü jembiogo. Saeed-i aniba Jamat-ud-Dawa ya Lashkar-e-Toiba (LeT) atema lokti tentet tongti ka lir, shirnoki 2008 küm Mumbai maka America nunger nisung trok densema nisung 166 tepseta liasü. US Department of the Treasury ajanga Saeed ya Specially Designated Global Terrorist ta tenüing jalokja lir. Pa ya December 2008 nung UN Security Council Resolution 1267 nunga züingoksema lir.

## USnung COVID-19 agi asür nisung 250,000 jungogo

**Washington, Yimpoksüi/Nov. 19 (Agencies):** United States nung COVID-19 agi nisung quarter-million ka dak tema süogo, ta Johns Hopkins University ajanga Bodhbarnü asadangteta lir.

US, kong nisung 250,029 asüba tenüing zülüoka ali, iba ya alima nung nisung timtiba nisung 166,699, india nung nisung 130,993 aser Mexico nung nisung 99,026 asüba jangjateta lir.

Tir Donald Trump-i iba virus atema khuret maben, mask ka agitsüa memolung aser November 3 election atema nübuyimba sentong tulu agia aru, saka pai Joe Biden mekottet.

Trump yagi tang tashi tir election nung tamakok ajuruogo ta agizükteta mali aser Trump indang campaign ajanga ken o benoka aliba metembang tashi Tir shimteta alisang Biden nem sorkar memelenoktsütsü atema tenokdangba agütsür amai ajiteter.

"Tang tashi asenok ket nung asenoki aginüba ama peria mali aser item rongnung personal protective equipment aser COVID-19 mozü alemtsü sentongtem dena lir," ta Biden-i

Bodhbarnü tekümdangtsü ashi.

Item osangtsüsang tang tashi memetetdaksüba ajanga par teloki iba virus den raratsü atema renemshiba nung menudaktsütsü, ta Biden-isa ashi.

Tawa coronavirus tashidak menaba aser iba tashidak agi nisung asüba tali kümaka US tesem aika nung social distancing yimya, mask agiba aser danga meratem magir aser mamshir.

School system tulu rongnung mezüingbuba lapokbaji New York City ya asütsü, ta jembia liasü, saka iba yimti nung kaketshir tsüingtong oa class nung asenba aser school tem lapokba Bodhbarnü shibangogo.

Iba linük nung tawa anogoshi nisung 1,000 dak tema asüba aser nisung tasen 150,000 dak iba tashidak puteta arur.

Mozü ana tendangba nung mapa junga inyaka lir, aser ibaji ajanga US aser alima nem teimla agütsür.

Biden-i America nunger dang mozü ka nübur ajak amshitetsüsa mongutet tashi mask agitsü aser social distance yimya amshitsü ajungshia arur.



## TTC nem Bolero gari ka agütsü

**Tening, Yimpoksüi/ November 19, 2020 (TYO):** Brehostibanü (19.11.2020) 14th FC (Municipal Affairs Department) nungi Tening Town Council-i Bolero gari ka agizükogo.

Iba gari ya Additional Deputy Commissioner, Rhosietho Nguori, Tumben P. Tsanglao, Extra Assistant Commissioner den külemi GBs aser lokti lennirtem matsüngdang agizüka liasü. Kasa mapang LBA indang Executive Secretary, Rev. Kitanwi Chewang-i iba gari meshiteta sarasademtsü, ta sangdong ka ajanga metetdaksü.

## NPSC ajanga metetdaksür

**Dimapur, Yimpoksüi/ November 19, 2020 (TYO):** Nagaland Public Service Commission, Secretary, John Tsulise Sangtam, NCS-i sangdong ka ajanga, stenographer atema shorthand nung speed test aser typist atema typewriting nung speed test tatidang commission-i ketdang asütsü ta metetdaksü.

Temetetsü kaji, temaba grade atema grade balaka nung mapa teinyakdak alir aser tejangja Stenographer temi iba speed test atema apply sütetsü akok.

Anungji, 21/11/2020 anogo matongdang speed test atema

appointing authority temi mapanung anioker alir shirnok tejangja mapa ngur lir parnok anioktsü akok.

Mapa inyakterem indang 'nomination letter' ajak nung parnok indang appointment, regularization aser confirmation order adentsüla.

Maneni, temsüa alir candidate indang tenüngtem 27/11/2020 nü nikongdang 2:00 ako sülen Commission indang Notice Board aser Website nung agütsütsü. Stenographers aser Typists atema tatidang anogo 03/12/2020 aser 04/12/2020 agi melenogo, ta kasa sangdong nung shia lir.

## Assam Rifles-i COVID-19 campaign ayongzük

**Dimapur, Yimpoksüi/ November 19, 2020 (TYO):** HQ IGAR (N) kübok Assam Rifles indang Jalukie Battalion-i Bodhbarnü (18.11.2020) Old Tesen village, Peren nung COVID-19 awareness campaign ka ayongzüka agiogo, ta sangdong ajanga metetdaksü.

Iba campaign agiba mapang, AR team-i yimertem dang

COVID-19 tashidak aser iba wara nungi kümzüka alitsü indang tongtibangtem rasa ashi. Tang ama tensa ka nung, zübazülema melii teti senzusenbongdang tejak nembangba mask inoktsü aser sanitiser amshitsü asoshi team-i ajungshia liasü.

Kasa sentong nung, yimertem atema team-i medical

camp ka achaayangtsü. Iba den külemi Sainik School, Punglwa nung online registration atema inyakyimtem metetdakja liasü. Iba campaign nung nisung 48 denogo.

Security forces-i nüburtem atema bilemja iba campaign sentong ayongzüksüba atema yimertemi Assam Rifles dang pelaba metetdaksüogo.

## Taylor Swift-i 'Songwriter of the Year' award agizüktsü



Taylor-i sayaba 'folklore' kensep, koba ajanga record yangluogo, iba kensep atema pop superstar-i award angutsü. Iba kensep sayaba anogo nung pop kensep rongnung stream timtiba atema Apple Music albums chart nung iba kensep yagi t e m a b a j e n j a n g tongtet.

Taylor, shibai taküm lock down mapang iba

**Yimpoksüi/November 19, 2020 (Agencies):** 2020 Apple Music Awards sentong nung Taylor Swift-i 'Songwriter of the Year' award angutsü.

Tech company tetsüti Apple indnag aruya aliba Music Awards sentong tanabuba nung 'cardigan' ken atenla Taylor-i iba award agizüktsü ta sangdongogo.

Taküm küm tom nung

LP (folklore) zülua liasü lai ashiba agi, "Küm mashi ka nung 'Songwriter of the Year' award agizüktsü asoshi ni kanga dang yongyar, saka taküm iba award ya tanga dang nungi balaka ama ni bilemer, kechiyong ken züluba ajanga fans den tali tesendaktep akangshitsü asoshi ni maangka angu. Iba maparen (ken züluba) ya ni atema kanga dang

tongtibang kechiyong ni züluba ken balala nung parnoki (fans) angadanga telangzüba tajung jenti agütsüba yong kü maparen nung tali dang nungitter. Ajasünung, kü molung taroktiba nungi fans aser Apple Music nung inyaker ajak dang pelaba lemsateper."

Kasa sentong nung Rapper Roddy Ricch-ia 'The Box' atema Top Song of the Year aser 'Please Excuse Me for Being Antisocial' atema Top Album of the Year angutsü.

Maneni, Apple Music Awards sentong ya December 14, 2020 nü agitsü.

### 2020 Apple Music Awards takok angurtem:

- \*Artist of the Year: Lil Baby
- \*Breakthrough Artist of the Year: Megan Thee Stallion
- \*Songwriter of the Year: Taylor Swift
- \*Top Song of the Year: 'The Box' by Roddy Ricch
- \* Top Album of the Year: 'Please Excuse Me for Being Antisocial' by Roddy Ricch

## Pelaba Lemsateper



**Lt. Intimakla Lkr**

21:05:1981 - 15:11:2020

"Ni rara tajungji raraogo, ni alizüng tonga asemogo, ni tamangji yuogo." 2 Timoti 4:7.

Teti dang meima aliba Lt. Intimakla Lkr (Longjang), iba akümüli wadang tembanger November 15, 2020 anogo nung alima nungi pilaogo. La mapang tatsüka shiranga aliba mapang lokti tentet balala, kija aser kibong ajaki nübo, rongsen aser sarasadem agi nungita yariba asoshi nenok ajak den kanga pelaba lemsateper.

Onoki meyipa agütsütsü kecha meliaka, Teyanglur Tsüngremi nenok ajak moajangma.

- Temeim kinungbo, jala & kinungertem.



**NTPC Limited**  
(A Govt. of India Enterprise)

Registered Office Address : NTPC Bhawan, Core-7, SCOPE Complex, 7-Institutional Area, Lodhi Road, New Delhi-110 003  
Corporate Identification Number- L40101DL1975GOI007966

Tekalen agüja aliba applicant-i 01.04.2019 nungi 31.03.2024 atema Bongaigaon Thermal Power Station indang tarif agizüktsü atema Central Electricity Regulatory Commission, New Delhi dangi application agütsüogo.

### 1. Iba generating station indang tajangzük angutsüper temji:

- Assam Power Distribution Company Ltd, Bijulee Bhawan, Paltan Bazar, Guwahati - 782 001
- Meghalaya Energy Corporation Ltd, Short Round Road, Shillong - 793 001
- Department of Power, Government of Arunachal Pradesh, Itanagar
- Power and Electricity Department, Govt. of Mizoram, Aizawal-796001
- Manipur State Power Distribution Company Ltd., Khwai Bazar, Keishampat, Imphal 795001
- Department of Power, Govt of Nagaland, Kohima
- Tripura State Electricity Corporation Limited, Bidyut Bhawan, North Banamalipur, Agartala - 700 001

- Capacity of the generating station : 750 MW
- Capital cost of the project : Rs 8149.54 Cr (as on 1<sup>st</sup> Quarter of 2017 price level)
- Authority which has approved the Capital Cost : CERC (To be approved)
- Date of commercial operation : 26.03.2019
- Capital cost on the date of Commercial operation : 6272.99 Cr\*
- Tariff Tejangjatem

Particulars	Tariff for the previous year*	Year-wise tariff sought to be determined				
		2019-20	2020-21	2021-22	2022-23	2023-24
1. Capacity Charges (Rs.Lakh/year)	132266.79	136290.52	136074.83	139129.09	144863.79	146971.93
2. Energy Charges (Paise/kwh)#	315.809	326.750				

\* Iba station dak sendakba nung 2014-19 mapang atema Tariff indang maparen melentsü asoshi taoba mapang CERC nung petition agütsüba ama.

# Tariff mapang tenzükdang ECR ya energy charge rate tetenzük lir. Ajisüka, CERC Regulation agi melaba ama fuel cost(s) aser GCV(s) nung jemdaker tenzükba ita atema energy charge rate shitakba nung anidaksü.

8. Tariff atema application indang copy ka NTPC indang website - Tab "Notices" kübok [www.ntpc.co.in](http://www.ntpc.co.in) nung agüja lir.

9. Application nung dena aliba tariff dak sendakba nung tebilemba aser tashishiba kar danga lira, iba osang sangdongba anogo nungi tenzükba beneficiary danga application agütsür mashi kati anogo 30 tsüngda copy ka den Secretary, Central Electricity Regulatory Commission, 3<sup>rd</sup> & 4<sup>th</sup> Floor, Chandernagore Building, 36, Janpath, New Delhi - 110001 nung agütsütsüla.

Date : 24/07/2020 (Rohit Chhabra)  
Place : New Delhi Addl General Manager (Comml)

**Leading the Power Sector**

## ----- ALI AYOKER -----

Vihokhu yimtak Rs 45 per sq.ft (negotiable) agi ali ayoktsü lir. Foothill Road nungi minute 2 lenmang talang.

Taginürtemi teküboklen agüja aliba no. nung tongtepratepang.  
1) 9383344284 2) 9862403626



Shillong, Yimpoksüi/November 19, 2020: State nung Inner Line Permit (ILP) menoa mebenokba atema Brehostibarnü Khasi Students' Union (KSU)-i longkak aitba sentong ka ayongzüka agiogo aser ashiba agi, longkak aitba tesashiba akümütsü. KSU, FKJGP, HNYF, RBYF GSU, AYWO aser ADE-i Malki ground nung mener longkak aitba sentong nung shilem agia liasü.

In the Court of  
**Principal and District & Sessions Judge**  
Mokokchung: Nagaland

### NOTICE

NOTICE INVITING CLAIMS/OBJECTIOS OF OTHER CLAIMANT(S) FOR ISSUE OF SUCCESSION CERTIFICATE UNDER PART -I OF THE INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late Lemdongnukshi has been applied by Smti. Moasenla W/o Lt. Lemdongnukshi R/o H.No 07 Changtongya Town Mkg Nagaland for possession of.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before 19.12.2020.

Given under the hand and seal of the court on this day the 19.11.2020

**Principal District & Session Judge**  
Mokokchung, Nagaland



## Tuensang nung 28buba LMPS tenzükogo



Tuensang, Yimpoksüi/November 19, 2020: Brehostibarnü, Loyem Memorial ground nung Deputy Commissioner Kumar Ramnikant IAS-i 28buba Loyem Memorial Penalty Shootout asayamung tenzüksüdang agiba noksa ka yangi angur.

**Tuensang, Yimpoksüi/November 19, 2020 (TYO):** Brehostibarnü (19.11.2020) Loyem Memorial ground Tuensang nung 28buba Loyem Memorial Penalty Shootout (LMPS) tenzükogo. Iba asayamung lapokba sentong nung Kumar Ramnikant IAS Deputy Commissioner Tuensang tongti tesemdang ama aruagi aden aser pai iba asayamung tenzükja liasü.

Iba penalty shootout ya Confederation of Chang Students' Union ajanga "Kick Social Discrimination" omen nung ajemdaker ayongzüksür, kong team 46 agi shilem agitsü.

Tang ama coronavirus wara ajanga tenokdangba jenti ajuruaka, COVID-19 dak sendakba SOPs aser temzüng

nung anidaka iba asayamung ayongtsü molungtetba atema DC-i, organizing committee aser CCSU dang pelaba metetdaksü. Omen nung shia aliba ama, atangji nunga alima ajunga nung meimchir tsüingda kati ka mesüra kin kati tanga kin ka bendanga amshitepba jakla/shisatsü keta lir, saka saisapong ka ajanga ajak longjemer iba anema raratsü atongtetba ya tasa tajung, ta DC-i ashi.

DC-isa, iba asayamung nung shilem agitsüpur team ajak dang SOPs aser temzüng nung anidaksü asoshi tetuyuba agütsü, ajiasünungang asenok ajak longjemer COVID-19 wara koktettsü.

LMT Convener, M. Mongba-ia telok pela agizükba

mapang, tesüiba küm 27 tejakdang senior soccer open championship ka ama LMT ya tenzük, saka COVID-19 wara tenokdangba ajanga aser iba ama tensa ka nung nübürtem kümzüka yutsütsü atema 28buba edition ya Penalty Shoot asaya ka ama ayongzüksü lemtet, ta ashi.

Maneni, iba asayamung tenzük, Baptist Thangyen School vs Wela Foundation School aser Holy Angels School vs Tuensang Village Sports Foundation tsüingda Beti Bachao Beti Padhao exhibition match asaya liasü.

Iba sülen, DC Tuensang Team aser SP Tuensang Team tsüingda exhibition match ka asaya, ta sangdong ajanga metetdaksü.

## Munaf Patel Kandy Tuskers nung denogo

**Colombo, Yimpoksüi/November 19 (Agencies):** Taoba India nung pacer Munaf Patel, Kandy Tuskers puri Lanka Premier League (LPL) mezüngbuba nung asayatsü atema anisemogo. Iba asayamung ya November 26 nung tenzüksü.

Arishi küm 37 tain Patel-i India team nungi Test 13, ODI 70 aser T20I asem asayaogo aser 2011 World Cup akokba team nung pa densema liasü. Kandy Tuskers nung pa taoba mapang India teammate Irfan Pathan den külemi asayatsü.

"Taoba India fast bowler Munaf Patel-i @KandyTuskers den tenangzüktepba ka yangluogo," ta LPL-i Mongolbarnü tweet asü.

Kasa mapang nung taoba Pakistan captain Sarfaraz Ahmed-i iba asayamung nung shilem magitsü atema telemtetba agiogo.

Sarfaraz lenisüba kübok Galle Gladiators asayatsü liasü, saka pa New Zealand Tour atema national team nung shimokba ajanga iba asayamung nung shilem magitetsüsa kümogo.

"New Zealand tour atema

Pakistan squad nung Sarfaraz züngoksemogo, anungji pa Sri Lanka-i maotsü," ta Galle franchise coach Moin Khan-i ashi.

"Onok captain tasen ka shimtsüsa akümtsü. Team kibur aser management den sensak asema sülen anogo ka ana tsüingda telemtetba agitsü," ta paisa ashi.

Osang ajangasa ashiba agi, Sri Lanka T20 captain Lasith Malingai tejakdang ser Gladiators pur pacer tem asayatsü liasü, saka pa LPL nung asayatsü masayatsü tang tashi telemtetba magiteti lir.

Malinga, shibai tawa tembangbuba IPL nung masayatsü asoshi telemtetba agi, pai LPL nunga shilem magitsü asoshi tebilemba aliba sayuogo.

"Pa mapang tatsüka training magiteti aruogo aser iba ajanga tera atidaker. Onoki pa ajungmesotsü merangdar. Pa kanga nungtugu lir aser onoki pa asayadaksüner," ta team kibur Nadeem Omar-i ashi.

Gladiators pur November 27 nung Jaffna Stallions den asayamung tenzüksü.

Gladiators dak alia tanga team pezüa Hambantota tongogo aser bio-secure bubble kati iogo.

Ajisüaka Chris Gayle-i iba asayamung shilem agitsü magitsü mejangjai lir, shiba Kandy Tuskers franchise-i alizükogo.

"Chris Gayle asayatsü masayatsü mejangja. Gayle tang tashi Tuskers den contract dak sendakba nung sensaksemdar," ta ESPNcricinfo sangdong ka ajanga metetdaksü.

Osang ajangasa, Jaffna Stallions-i Pakistan batsman Asif Ali aser England batsman Dawid Malan na melena taoba South Africa nung fast bowler Kyle Abbott aser Duanne Olivier na anisemogo.

Malan, South Africa den asayatsü aliba asayamung atema England team nung shimogo, ibayongji pa masayatetsü.

"Stallions-isa batsmen Ravi Bopara aser Shoaib Malik na anisemba metetdaksüogo, saka tena asayatsü masayatsü mejangjai lir," ta kasa sangdong ajanga metetdaksü.

## ATP Finals: Daniil-i Djokovic kokogo

**London, Yimpoksüi/November 19, 2020 (Agencies):** ATP Finals asayamung tebur kija asaya nung Russia nung Daniil Medvedev-i Novak Djokovic madak 6-3 6-3 agi takok angu.

World no.1 Djokovic-i kanga meranga asaya tenzük aser ibaji ajanga pai 3-2 agi Tokyo Group

nungi asayasang Daniil tejakdang ser asaya. Ajisüaka, arishi küm 24 tain Daniil-i tasa tajung amshia iba asaya azüokteta liasü.

Asayar ana tsüingda kanga toktepa asaya aser Daniil Medvedev-i game tenet tashi atonga takok angudang Djokovic aoksadok.

## Nations League: England, Belgium aser Italy nungeri kokogo

**London, Yimpoksüi/November 19, 2020 (Agencies):** UEFA Nations League Group A2 asaya tatembangbuba nung Phil Foden-i goal ana tashi idakja England-i Iceland madak goal 4-0 agi takok angu.

Iba asaya tenzük, minute 20buba nung England-i free kick ka metsütsü maongka ngua West Ham United nungi asayasang Declan Rice kolak agi mezüng goal idaktsü aser minute 4 sülen, Chelsea midfielder Mason Mount-i goal tanabuba idakja England team pur goal 2-0 agi Iceland tejakdang ser mezüng half tembang.

Tanabuba half nung, Birkir Mar Saevarsson, shibai team atema asaya 95buba nung shilem agia liasü, pai asaya dak mapet yimya amshia tanaben yellow card anguba ajanga asaya nungi tukudaksüba mapang, Iceland pur asaya raksadok.

Iba asaya nungi Birkir tukadokba sülen minute 10 lir Manchester City midfielder arishi küm 20 tain Foden-i England atema goal tasembuba inoktsü, koba England team atema pai mezüng goal idakja liasü. Minute 4 sülen, Foden-isa telok atema goal tanabuba bendenlokja England-i iba asaya goal 4-0 agi takok angu.

Leuven kübok asaya tanga ka nung, taruba küm Nations League finals nung jenjang ka ngutettsü atema Romelu Lukaku-i goal ana tashi idakja Belgium-i Denmark madak goal 4-2 agi takok nguogo.

Iba asaya tanabuba half nung Lukaku-i minute 57' aser 69' buba nung goal ana tashi idaktsü. Belgium atema külem asayar Yuri Tielemans-i asaya tenzükli minute 3buba nung mezüng goal idaktsü aser asaya atemtsü lia minute 87buba nung Kevin De Bruyne-i goal ka inoktsü. Minute 17 sülen Denmark atema Jonas Wind ajanga mezüng goal idaktsü aser asaya atemtsü minute 4 lia Belgium nungi Nacer Chadli-i mekümdangi pei telok indang

nung goal idaktsüba ajanga Denmark pur goal 2 kümadok.

Kasa asayamung - Nations League A Group 1 asaya nung Netherland-i goal 2-1 agi Poland kokogo. Minute 77buba nung Memphis Depay-i penalty ka ajanga mezüng goal aser Georginio Wijnaldum-i minute 84buba nung goal tanabuba idaktsü. Iba asaya tenzük, Kamil Jozwiak-i minute 5buba nung mezüng goal idaktsür sülen mezüng half tashi Poland goal 1-0 agi Netherland tejakdang ser asaya. Netherlands-i asaya trok nungi point 11 ngua, table nung Italy sülen par telok jenjang tanabuba nung lir. Kasa mapang, Poland-ia point 7 ngua jenjang tasembuba tongtetogo.

Italy-ia Nations League final four tongtettsü atema goal 2-0 agi Bosnia kokogo. Iba den külemi Italy team-i asaya 22 atonga takok nguogo.

Iba asaya tenzük, Andrea Belotti-i minute 22buba nung mezüng goal idaktsü aser tanabuba half nung Domenico Berardi-i minute 68buba nung telok atema goal tanabuba bendenloktsü. Tang Nations League Group A1 nung Italy team-i asaya trok nungi point 12 ngua temaba jenjang tongteta lir.

Italy indang coach Roberto Mancini dak COVID-19 putetba sülen pai külem team pur asaya nung metentet. Kasa mapang Italy nungi tongtibang asayatem talisa defender ana Giorgio Chiellini and Leonardo Bonucci yiruba aser COVID-19 dak sendakba nung Ciro Immobile nokdangba ajanga iba asaya nung parnoki shilem magitet.

Ano külen, Ibrahim Sehic, Sead Kolasinac aser Edin Dzeko nung dak COVID-19 putetba ajang Bosnia atema par asempronglai masayatet.

"Bendanga agütsür asayatsü atema coach-i mapang shia onok dang ashir aser iba tesayuba temolung nung yur onoki asayar," ta Italy winger Lorenzo Insigne-i ashi.

## BILEM DANGANG

"Tajung atema tasiüta aser molungsoa inyakang."